

BOSNA I HERCEGOVINA
FEDERACIJA BOSNE I HERCEGOVINE
VRHOVNI SUD
FEDERACIJE BOSNE I HERCEGOVINE
Broj: 18 0 Rs 050036 22 Spp
Sarajevo, 23.03.2022. godine

Vrhovni sud Federacije Bosne i Hercegovine u Sarajevu, odlučujući o zahtjevu za rješavanje spornog pravnog pitanja Općinskog suda u Bosanskoj Krupi od 11.01.2022. godine, na osnovu odredbe člana 61. Zakona o parničnom postupku¹, te odredbe člana 18. Pravilnika o unutrašnjem sudskom poslovanju Federacije Bosne i Hercegovine i Brčko Distrikta², u sjednici Građanskog odjeljenja održanoj 23.03.2022. godine donio je:

O D L U K U

Odbacuje se zahtjev Općinskog suda u Bosanskoj Krupi za rješavanje spornog pravnog pitanja u predmetu tog suda broj 18 0 Rs 050036 21 Rs, koji glasi:

„Da li je dopušteno Odluku poslodavca kojom je radniku izrečena isključivo mjera pisanog upozorenja bez drugog vida sankcije (umanjenja plate, premještaja na drugo radno mjesto i sl.), pobijati tužbom u parničnom postupku, a u smislu odredaba člana 97. stav 2. i člana 114. Zakona o radu F BiH ? “

O b r a z l o ž e n j e

Dopisom od 11.01.2022. godine, koji je zaprimljen u ovom sudu dana 14.01.2022. godine, Općinski sud u Bosanskoj Krupi dostavio je ovom sudu, po prijedlogu punomoćnika tuženog, zahtjev za rješavanje spornog pravnog pitanja u predmetu broj 18 0 Rs 050036 21 Rs po tužbi tužiteljice Nermine Šertović protiv tuženog JU Dom zdravlja Bosanska Krupa.

Iz sadržaja zahtjeva proizilazi da je tužiteljica, kao radnica, podnijela tužbu protiv tuženog, kao poslodavca, kojim je tražila utvrđenje nezakonitosti i poništenje tuženikove Odluke o pismenom upozorenju radnika broj UO-33/21 od 13.07.2021. godine, a kojom je pismeno upozorena na dužnost poštivanja obaveza iz radnog odnosa preuzetih ugovorom o radu, ta da u slučaju da se prijestup ponovi u roku od šest mjeseci nakon izdavanja pismenog upozorenja da će se otkazati ugovor o radu bez davanja predviđenog otkaznog roka. Nadalje, da je proveden disciplinski postupak zbog lakših disciplinskih povreda, da je odredbom člana 97. stav 2. Zakona o radu propisano da u slučaju lakših prijestupa ili lakših povreda radnih obaveza iz ugovora o radu, ugovor o radu se ne može otkazati bez prethodnog pisanog upozorenja radniku, a članom 114. istog zakona da radnik koji smatra da mu je poslodavac povrijedio neko pravo iz radnog odnosa može u određenom roku zahtijevati od poslodavca ostvarivanje tog prava, pa ukoliko tu povredu prava ne uspije „ispraviti” kod poslodavca, radnik u daljem roku može podnijeti tužbu pred nadležnim sudom.

¹ „Službene novine F BiH“ broj 53/03, 73/05, 19/06 i 98/15

² „Službeni glasnik BiH“ broj 66/12 i 40/14

Tuženi pozivom na odredbe članova 97. stav 2. i 114. Zakona o radu smatra prijedlog osnovanim i da je od značaja za odlučivanje u postupcima koji se vode pred Općinskim sudom u Bosanskoj Krupi, ali i za postupanje drugih prvostepenih sudova u identičnim situacijama.

Tužiteljica u svom izjašnjenju osporava navode tuženog, i navodi da je saglasna da ovaj sud izrazi pravno shvaćanje o spornom pravnom pitanju.

Prvostepeni sud je dao sopstveno tumačenje spornog pravnog pitanja i pri tome naveo: da je dopuštena tužba radi preispitivanje odluke poslodavca kojom je radniku izrečena mjera pisanog upozorenja, odnosno da se takva odluka može preispitivati u sudskom postupku i da radnik ima pravni interes za podnošenje tužbe sudu.

Osnovom stanja spisa proizilazi da u postupku pred prvostepenim sudom imaju dva predmeta u kojima postoji potreba da se zauzme stav o spornom pravnom pitanju.

Odredbom člana 61c. ZPP propisano je:

- (1) Vrhovni sud Federacije odbacit će nepotpun ili nedozvoljen zahtjev za rješavanje spornog pravnog pitanja.
- (2) Zahtjev iz stava 1. ovog člana je nedozvoljen ako je o takvom zahtjevu Vrhovni sud Federacije već donio odluku.

Predmetni zahtjev Općinskog suda u Bosanskoj Krupi za rješavanje spornog pravnog pitanja je istovjetan kao u (drugom) predmetu tog suda broj 18 0 Rs 050037 21 Rs (isti pravni i činjenični osnov, isti tužbeni zahtjev, isto sporno pravno pitanje), a o kojem zahtjevu na sjednici građanskog odjeljenja ovog suda, već je donijeta odluka broj 18 0 Rs 050037 22 Spp od 22.02.2022. godine, kojom je taj zahtjev meritorno riješen.

Kako je o zahtjevu za rješavanje spornog pravnog pitanja, već donijeta (meritorna) odluka, to je primjenom stava (2) člana 61c. ZPP odlučeno kao u izreci ove odluke.

Predsjednik Građanskog odjeljenja
Radenko Blagojević, s.r.